

【经文信息】大正藏第 12 册 No. 0331

佛说无畏授所问大乘经 3 卷

[卷上](#) [卷中](#) [卷下](#)

No. 331 [Nos. 310(28), 330]

佛说无畏授所问大乘经卷上

西天译经三藏朝奉大夫试光禄卿传法大师赐紫沙门臣施护等奉 诏译

如是我闻。一时世尊。在舍卫国祇树给孤独园。与大苾刍众千二百五十人俱。皆是阿罗汉。诸漏已尽无复烦恼。心善解脱慧善解脱。如大龙王所作已办。弃诸重担随得己利。尽诸有结。正智解脱。诸心寂静皆到彼岸。唯一补特伽罗。所谓阿难。

复有五百大菩萨众。悉得一切陀罗尼门及三摩地门。皆是一生补处。时舍卫城有一长者。名无畏授。大富自在有大财宝。积诸受用库藏充满。金银琉璃真珠珊瑚螺贝宝等。皆悉具足。广有车乘象马牛羊。复多眷属奴婢仆从执事人等及诸朋友。一时无畏授。与五百长者。而共集会潜相谓言。诸仁者。遇佛出世斯为难事。人身难得时难契会。于佛教中净信极难。舍家出家成苾刍相。此亦为难。修行复难。彼诸有情知恩念报。而复甚难。但能少分施作尚不坏失。何况广多。又诸有情。若于如来教中能生净信。信已复能依教修行。极为难事。又诸有情。若能庄严如来教法。复能解脱轮回极为难事。是故我等。不应于声闻乘及缘觉乘中趣求涅槃。应于无上大乘法中趣求涅槃。于是众会以如是事。互言议已。咸悉发起广大胜心。皆言我今悉于无上大乘法中趣求涅槃。不乐声闻缘觉之乘。时无畏授与五百长者俱共围绕。出舍卫城诣世尊所。到已头面礼世尊足。右绕七匝退坐一面。

尔时世尊。知是事已故。谓无畏授等五百长者言。汝诸长者以何缘故。来诣如来应供正等正觉所。

时无畏授等五百长者。悉从座起。偏袒一肩右膝着地。向佛合掌顶礼白言世尊。我等向者共会一处。潜相谓言。遇佛出世斯为难事。人身难得时难契会。于佛教中净信极难。舍家出家成苾刍相此亦为难。修行复难。彼诸有情知恩念报而复甚难。但能少分施作尚不坏失。何况广多。又诸有情。若于如来教中能生净信。信已复能依教修行。极为难事。又诸有情。若能庄严如来教法。复能解脱轮回。极为难事。我等今时不应于声闻乘及缘觉乘中趣求涅槃。应于无上大乘法中趣求涅槃。世尊我等以如是事互言议已。咸悉发起广大胜心。皆于无上大乘法中趣求涅槃。不乐声闻缘觉之乘。我等乘此缘故。来诣如来应供正等正觉所。世尊诸菩萨摩訶萨。欲证阿耨多罗三藐三菩提者。当云何住。复云何学。云何修行。

尔时世尊。赞无畏授等五百长者言。善哉善哉。汝诸长者甚善甚善。汝今能为安住阿耨多罗三藐三菩提。故来诣如来应供正等正觉所。汝等谛听极善作意。今为汝说。时无畏授等五百长者受教而听。

佛言诸长者。若菩萨摩訶萨。欲证阿耨多罗三藐三菩提者。如其所住当如是学如是修行。

又若菩萨摩訶萨。欲证阿耨多罗三藐三菩提者。应于一切有情起大悲心普遍亲近。广为摄受观察施作。而菩萨摩訶萨。于自身命不应爱着。所有舍宅妻子眷属饮食衣服乘馭床座珍宝财谷香华灯涂。乃至一切受用乐具悉不应着。何以故。多诸有情爱着身命故。广造罪业。彼彼所作业成熟已。堕在恶趣地狱中生。若于一切有情起大悲心。于自身命不爱着故。即于一切善趣中生。诸长者。是故菩萨摩訶萨。欲证阿耨多罗三藐三菩提者。于一切有情起大悲心。于自身命不生爱着。所有舍宅妻子眷属饮食衣服乘馭床座珍宝财谷香华灯涂。乃至一切受用乐具。悉不爱着已。然后自舍一切广行惠施。不求果报安住戒行。三相清净修诸忍辱。堪能具足一切有情。于己所作不饶益事。悉能忍伏。被大精进坚固甲冑。若身若命悉能弃舍。安住寂静心一境性。远离散乱胜慧决择诸善法分。不起我人众生寿者士夫补特伽罗意生等见。广为一作诸胜行。为一切有情作意行施。为一切有情作意护戒。为一切有情作意行忍。为一切有情作意发起坚固精进。为一切有情作意安住诸胜定门。为一切有情作意修慧。为一切有情习学一切善巧方便。

尔时无畏授等五百长者俱。白佛言世尊。我等昔来于自身命皆生爱着。所有舍宅妻子眷属饮食衣服乘馭床座珍宝财谷香华灯涂。乃至一切受用乐具悉生

爱着。世尊菩萨摩訶萨。作何观察能于身命乃至一切受用乐具。不生爱着。愿佛为说。

尔时世尊。告无畏授等五百长者言。菩萨摩訶萨。以无数种相观察于身。何等无数。所谓此身不实缘法。合集如极微聚。从顶至足次第破坏。彼九窍门及诸毛孔。不净流溢犹如蚁聚。蛇毒止中蛇毒违害。如怨敌如猿猴。多所损恼。如极恶友常起净竞。身如聚沫不可撮摩。又如水泡旋有即坏。又如阳焰渴爱所生。又如芭蕉中无坚实。又如幻化从虚妄起。又如王者多种教令。又如怨对常来伺便。又如盗贼无有信义。又如杀者极难调制。如恶知识常不欢喜。如破法者隐没慧命。又如邪朋减失善法。又如空聚离于主宰。又如瓦器终归破坏。如小便坑不净充满。如大便处常多滓秽。又如食噉诸不净鬼及蛆虫狗等乐臭秽中。又如广积秽物远闻其臭。如恶疮疱难合其窍痛不可忍。又如毒箭入身酸楚。如恶家主难为侍养。又如朽舍及如漏船。虽假修治旋归散坏。又如坏器难为固惜。又如恶友常假将护。如河岸树风所动摇。如大河流终归死海。又如客舍多种违恼。如无主舍无所摄属。如巡警人常专捡察。及如边方多所侵娆。如积沙处渐当减下。如火蔓延。如海难渡。如地难平。如蛇置筐随生损害。又如婴儿常须存爱。又如破器无所堪用。如恶方处常虞坏乱。如杂毒食常当远离。如求乞人得种种物得已旋弃。又如大车负极重等。唯诸智者。于法觉了应如是知。

佛说无畏授所问大乘经卷上

佛说无畏授所问大乘经卷中

西天译经三藏朝奉大夫试光禄卿传法大师赐紫沙门臣法护等奉 诏译

复次长者菩萨摩訶萨。观察此身。最初何因之所成立。谓依父母精血合集生起彼因。复由受其饮食。食已变坏旋聚即散。归淡荫藏淡荫流润。终归不净。然后火大增强煮变成熟。后归风力。由其风力各分滓重及与流润。滓重所谓大小便等。流润谓血。血变成肉。肉成于脂。脂成于骨。骨成其髓。髓成其精。精等乃成此不净身。菩萨观此不净身故。乃起思惟。此身多种合集。各别名相。谓三百骨。六十肪及膏相。合四百膜。五百肉团。六百脑。七百脉。九百筋。十六肋骨。复有三事。内缠其肠分生熟藏肠。有十六交络而住。二千五百脉道透映。一百七节。八十万俱胝毛孔。具有五根。九窍。

七藏。不净充满。髓有一掬脑。有一掬脂。有三掬淡荫。六掬滓重。六掬风力。随遍血有一斗。如是一切各各充满。有七水脉。而复围绕。吸诸滋味。内火大增炽然烧煮。逼切疲极。身脉汗流。是等诸相极难可见。此之臭秽不净体相。是中云何起增上爱。如求丐人得所用物。得已旋弃。又如大车负极重等。唯诸智者于法觉了。应如是知即说颂曰。

此身多种不净聚	愚无智者不了知
强起增长爱着心	如秽瓶破多秽气
耳目口鼻皆秽物	彼等何者为香洁
涎眵结眵及涕洟	诸虫杂恶何生爱
譬如愚者取于炭	勤力摩治欲令白
炭尽力疲白莫成	无智妄贪亦如是
如人意欲成洁净	多种修治于此身
百转沐浴及香涂	身坏命终归不净

尔时世尊复告无畏授等五百长者言。长者当知。菩萨摩訶萨欲证阿耨多罗三藐三菩提者。观察此身有四十四相。何等四十四。谓菩萨摩訶萨观察此身诚所厌弃。菩萨观身不可爱乐。以不饶益故。菩萨观身极为臭秽。脓血满故。菩萨观身甚不坚牢。终破坏故。菩萨观身体性羸劣。筋骨相联故。菩萨观身不净。秽恶常流故。菩萨观身如幻。愚夫异生强起虚妄动乱相故。菩萨观身多所漏失。以九窍门常流注故。菩萨观身炽然烧爇。谓贪火所焚瞋火猛聚痴火暗冥故。菩萨观身贪瞋痴网。常所盖覆爱网相续故。菩萨观身窍穴所依。以九窍门及诸毛孔周遍流注杂秽充故。菩萨观身多种逼恼。四百四病常增损故。菩萨观身是为窟宅。八万四千户虫之所聚故。菩萨观身无常。终归死法故。菩萨观身无知。于法不知故。菩萨观身如器用。众缘合成终破坏故。菩萨观身逼切。众多烦恼故。菩萨观身无归趣。毕竟老死故。菩萨观身深隐。谄诳所行故。菩萨观身如地。难平满故。菩萨观身如火。以所爱色随系着故。菩萨观身无厌足。随五欲故。菩萨观身破坏。烦恼对碍故。菩萨观身无定分位。以其利衰现所受故。菩萨观身无自他缘。不得源流故。菩萨观身驰流心意。以种种缘作意伺察故。菩萨观身弃背毕竟。归于弃尸林故。菩萨观身为他所食。鸷鸟豺狼等食噉故。菩萨观身如轮盘影现。筋骨连接故。菩萨观身无所顾惜残弃漏失。脓血满故。菩萨观身耽着滋味。饮食所成故。菩萨观身勤苦无利。以是无常生灭法故。菩萨观身如恶友。起诸邪妄故。菩萨观身如杀者。重重现增苦故。菩萨观身为苦器。三苦逼恼故。所谓行苦坏苦苦

苦。菩萨观身为苦聚。五蕴随转无主宰故。菩萨观身极不自在。种种缘成故。菩萨观身无寿者。离男女相故。菩萨观身空寂。诸蕴处界所合成故。菩萨观身虚假。以如梦故。菩萨观身不实。以如幻故。菩萨观身动乱。如阳焰故。菩萨观身驰流。如响应故。菩萨观身虚妄所起。如影现故。长者。菩萨摩诃萨以如是等四十四相观察于身。而菩萨摩诃萨作此观察时。所有于身乐欲。于身顾惜。于身执我。于身爱染。于身积集。于身系着。一切悉断。由是于命乐欲。于命顾惜。于命执我。于命爱染。于命积集。于命系着。乃至舍宅。妻子眷属。饮食衣服。乘馭床座。珍宝财谷。香华灯涂。一切受用乐具。若乐欲。若顾惜。若执我所。若爱染。若积集。若系着。一切亦断。由于身命能弃舍故。乃至一切爱用乐具亦悉弃舍。如是乃能圆满六波罗蜜多。长者。菩萨摩诃萨以能圆满波罗蜜多故。即能速证阿耨多罗三藐三菩提。

尔时世尊欲重宣此义即说颂曰。

应知人身极难得	莫因此身造众罪
豺狗取食弃尸林	空将此身为残弃
愚无智者常动乱	虚伪身中起贪爱
此身难馭违背深	昼夜受苦无停息
此身苦轮常生病	此身不净广充盈
饥渴随逐烦恼深	谁诸智者生爱着
此身如地广无主	及如恶友愚生爱
因此身故众罪兴	毕竟还自受诸苦
此身不同金刚坚	莫因此身广造罪
智者应修胜福因	于佛教中生净信
此身不久徒存养	衣服香严饮食资
缘归破坏暂任持	邪勤施作何空过
经百劫中难得遇	大牟尼尊出世间
速于佛教净信生	莫于恶趣受极怖
假使寿千俱胝岁	彼尚勿应生贪爱
何况寿不满百年	岂生贪爱无厌足
或有一类奢侈者	不念此身极难得
广集嬉戏歌伎人	于前戏剧求快乐
度集财宝何有乐	护惜重重苦恼增
下劣愚夫喜悦生	智者于中离贪着

富贵不实如梦幻 愚者驰流于心意
刹那破坏刹那成 谁诸智者生贪爱

佛说无畏授所问大乘经卷中

佛说无畏授所问大乘经卷下

西天译经三藏朝奉大夫试光禄卿传法大师赐紫沙门臣施护等奉 诏译

譬如幻所成物像	如干闼婆城庄严
愚人贪爱富亦然	不知是妄生耽着
百种苦求于财富	得已极苦逼于身
王官水火散坏时	智者岂生于爱着
妻子眷属随所爱	广作诸罪当破坏
极重过失不觉知	智者于身不生着
慳悋者求财富时	父母亦不生尊重
妻子眷属返憎嫌	一向常贪于财利
慳者不知于恩义	唯念莫坏我所有
背正向邪谄求财	智者于彼不生信
慳者意异语如实	所应信者不生信
见人虽将爱子同	此是慳者谄妄起
慳悋之者在世间	虽亲典教亦通解
驰流散乱出恶言	心无悲愍极麤犷
慳者处世无所托	亦无知识及亲朋
有所依附但求财	智于慳者不生信
慳者因求财富故	于极恶事起思念
是故智者正所观	愚人于彼生欢喜
金宝珠贝珊瑚等	善业引生如聚沫
于中贪爱净竞兴	彼不了知幻化性
贤劫一佛出世时	彼尊立名为慈氏
偏覆大地得黄金	彼从何来何因故
于外随逐五欲境	愚人散乱痴迷法
如日中分夏月时	渴欲奔驰焰为水

空后一劫成世间
焚烧破坏复还成
沟涧池沼及大海
虚假不实贪亦然
智者慧力色相具
此中无味染何因
随逐五欲造恶业
死时妻子及诸亲
死时眷属不随去
苦恼逼逐于己身
三有独怖无亲爱
愚人取以为乐因
父母妻子亲朋聚
彼等不随死者行
一切皆随业所行
当知此身业所成
父母妻子眷属等
愚人广造众罪因
所有余处业报尽
是故畏彼恶趣因
阎摩王前治罚时
亦无父母及诸亲
王言汝所得人身
今受极苦捶打时
自心所作不善已
如彼阎摩法王言
自作业因自造罪
当受极苦自甘心
死时众苦所逼迫
汝欲自求解脱时
打击考掠及桎械
舍宅亲友起怖心
舍宅猛火大苦根
智者于斯爱不生

虚空所成空自性
此从何来彼何去
枯涸破坏彼皆同
谁诸智者生爱着
于身常自作称量
舍宅财利应弃舍
养育妻子并眷属
谁能救护自当苦
但随自作众业行
彼时谁为我分受
妻子眷属假相亲
但增苦恼及忧戚
为求财利故相会
唯自所作业相逐
一切亦随业所住
智者应修于善业
以不了知故贪爱
智者不入无间狱
无间极苦不解脱
智者勤劬离诸罪
彼无朋友为救护
随自所作业当受
得已何不离诸罪
皆由汝作不善业
而复不信有业报
汝受治罚非我罪
自造罪已汝来此
由先所作非爱业
亲属不能令解脱
是故应离诸罪恶
此等若欲求远离
于佛教中修正行
而此心火常炽然
如大火聚极可怖

住舍养亲常忧戚	富乐忧愁亦复然
自他过失等无差	是故应离诸罪恶
智者佛教生信乐	不种自收胜乐根
愚者不生爱乐心	但贪舍宅诸苦本
女身筋肉骨合集	假起妄贪为我妻
诸无智者染爱生	不知女身都如幻
智者了知诸欲乐	及舍宅等皆生厌
正法药治贪病除	速疾出离诸缠缚

尔时无畏授等五百长者闻是正法已。悉得无生法忍。得法忍已。皆生最上踊跃欢喜。即说颂曰。

快哉于今日	我等得大利
彼一切利中	此利益最上
我等所发起	广大菩提心
于佛正法中	清净生渴仰
所起胜爱乐	无上菩提心
为一切有情	广施诸安乐
我等从今日	极甚其身命
誓于此深经	生最上爱乐
由起爱乐故	得一切有情
于彼当来世	见者生欢喜
彼一切有情	诸欲发心者
皆发起无上	广大菩提心
若一切有情	爱乐菩提心
当得胜果报	最上金色身
相好以庄严	种种胜殊妙
及得大光明	世间广照耀
无上菩提心	此心广大心
胜出一切心	最上复清净
彼一切功德	由此心具足
复具大胜力	能脱一切病
诸妙福有情	不乐菩提心
此心懈退因	不能观生死

菩提神通智	获最胜福力
广积满虚空	普施诸情品
若人于河沙	等数诸佛刹
满以七珍财	供养正等觉
若人但合掌	归向菩提心
此胜供养因	超过诸供养
此供养无等	所谓菩提心
过此外无余	为最胜最上
菩提心功德	是胜妙良药
一切病能治	施有情安乐
观见诸有情	三火常烧然
无量劫拔除	菩萨不懈退
修此菩提行	为勇猛医王
救苦诸有情	常远离疲懈
数数往诸趣	不舍菩提心
勤于佛法中	出现希有相
我等得大利	乐此菩提心
愿我等当成	大觉释师子

尔时世尊从其面门出现广大神通光明无数种色。所谓青黄赤白及紫碧绿。是光普照无边世界。上彻梵世。映蔽日月光明不现。其光旋环右绕世尊百千匝已。却从世尊顶门而入。尔时尊者阿难即从座起。偏袒一肩右膝着地。向佛合掌顶礼白言。世尊。何因何缘现是光明。若无因缘。如来应供正等正觉不放光相。时尊者阿难即说颂曰。

佛上胜者若无因	法尔不现光明相
愿为悲愍劣有情	说放光明何因故
一切有情皆贫乏	佛应为施大圣财
世间暗暝作照明	愿说此光所因现

尔时世尊。告尊者阿难言。阿难。汝今见此五百长者不。悉为发阿耨多罗三藐三菩提心故。来诣我所。阿难白佛言。唯然已见。佛言阿难。是五百长者。今此会中闻正法已皆得无生法忍。阿难。此诸长者皆于过去佛所。奉近供养深种善根。从此没已不复堕诸恶趣。生人天中受胜妙乐。次第至彼慈氏如来应供正等正觉出现世时。生彼佛刹亲近供养尊重承事。其后乃至贤劫诸

佛彼彼出世时。于一佛所亲近供养。听受正法读诵纪念广为人说。最后过二十五劫。于种种佛刹。皆当成就阿耨多罗三藐三菩提果。同名莲华吉祥藏如来应供正等正觉。出现世间。尔时尊者阿难前白佛言。今此广大甚深正法。希有世尊希有善逝。此经何名。我等云何奉持。佛言阿难。是经名为菩萨瑜伽师地法门。亦名无畏授所问。如是名字汝当受持。

佛说此经已。尊者阿难等诸大声闻。及诸菩萨摩訶萨众并五百长者。世间天人阿修罗等一切大众。闻佛所说。皆大欢喜信受奉行。

佛说无畏授所问大乘经卷下

【经文信息】大正藏第 12 册 No. 0331 佛说无畏授所问大乘经

【版本记录】CBETA 电子佛典 Rev. 1.11 (Big5), 完成日期: 2009/04/23

【编辑说明】本数据库由中华电子佛典协会 (CBETA) 依大正藏所编辑

【原始数据】萧镇国大德提供, 维习安大德提供之高丽藏 CD 经文, 北美某大德提供

【其他事项】本数据库可自由免费流通, 详细内容请参阅【[中华电子佛典协会数据库版权宣告](#)】
